

杭州府志
(乾隆)
二六

杭州府志卷一百三十五

人物四 仕績四

國朝

何元瑞字穎凡富陽人順治二年官安慶通判振濟逃亡民德之漕艘分民運軍運衆論靡定元瑞以民運重貽累謁巡撫痛切言之遂著軍運爲定制署桐城知縣重士愛民輕徭減賦以親老告

歸卒年七十六祀鄉賢祠

乾隆志

龔五字諤華茂仁和人八歲能屬文旋爲明諸生順治初以貢授浦城校官尋知順昌縣捍山寇有功愛民如子循聲卓著甫內擢

隨卒

康熙志

洪吉臣字載之錢塘人順治初以明崇禎六年舉人授德安府推官時湖廣大旱德安尤甚路多餓殍吉臣首出俸貲繼以借貸又勸富民共出粟米所在賑濟凡十有七次民賴以活德安士民作

五仁五清歌以紀其德

湖廣通志

吳百朋字錦雯錢塘人順治初以明崇禎十五年舉人授江南蘇州府推官蘇漕務刑獄最繁百朋用官收官兌法獄訟悉平猾吏斂手遷廣東肇慶會推官職裁補直隸南和知縣其俗見廉明之吏士民咸標旗幟樹壁上旌之南和旗幟爲滿卒於官子薦隨父宦蘇州時錢塘知縣顧咸建二子爲怨家所訐將召訊薦見其牘請曰顧公賢令當十世宥此獄不足竟也百朋從之後百朋候勘

抱沉疴薦觸暑走金陵營救感疾卒年二十人稱其死孝

錢塘縣志

高包諤字彥玉錢塘人順治初以諸生從征知福建仙遊縣移河南固始邑南北通六潁多盜東抵霍多強族西屬州多悍卒催科無術率挺而走險包諤因勢利導示儉示禮三年豪強輯而循謹

者衆在任八載卒

錢塘縣志

陳泰來字君遇富陽人順治初歲貢官桐廬訓導捐貲修學宮遷平湖訓導清釐陸宣公義田數十頃爲貧生膏火升溫州府教授先是士多逋糧有司責之衆譁於學遂斥其倡首者泰來至卽修葺學宮申復諸生永嘉令知其能委徵海隅諸生逋卒奏竣遷山東東平州判致仕歸

富陽縣志

袁之龍字雲從新城人明季負盲母避亂山中遇賊以身衛母母得無恙順治三年拔貢知臨城縣時三藩蠢動宵小竊發下車親率弁役日夕巡閱民賴以安遇亢旱力疾步禱行十里許雨如注民大悅築亭城南顏曰恩雨致仕歸士民卽亭祠之年九十一卒

新城縣志

趙廷標錢塘人順治三年以拔貢知福建永定縣邑初歸附三罹漳廣巨寇兵食莫繼城守孱弱廷標推恩義固人心調援他郡糴粟煮賑民困以舒六年粵大埔逸寇江龍率衆萬餘犯縣城廷標聚衆死守賊掘地入則瀦池水以待地礮不得發賊以雲梯乘城則於堞眼懸柵墮之相持三月食垂盡值立春日乃廣張鼓樂開

城迎春東郊賊懼有伏遂遁廷標密遣兵閒道往伏兩山間出不
意夾擊敗之追至龍礫寨擊殺殆盡七年擢湖南衡州府同知尋
署府事時經兵亂田畝榛蕪力請蠲荒民漸復業九年大飢多方
賑卹生全無算十七年擢雲南迤東分巡道安普諸蠻爲土官所
誘競作不靖廷標決策行閒遂復准摩舊地其二州彌勒巴盤八
甸咸驚恐乃移檄諭之令諸持田器者皆爲良民持兵者乃爲賊
單車巡行安撫諸路悉平康熙十年調廣東按察司副使分巡廣
肇南韶道安普民暨洞蠻聞其去至塹所行道發巨石塞城闔願
少留廷標慰諭再三乃得行適兩廣八排諸嶺寇起聞廷標至立
解散連州復亂鎮臣以勦捕委之至卽就撫肇舊有分巡使者柴

薪錢吏籍其贏餘以獻屏弗受頒給民之窮獨無依者踰年以憂去十八年授湖南驛鹽道捕獲劇賊斬其渠魁餘悉縱令歸農湘東民變轉掠百里偏沅巡撫韓世琦商廷標單騎往諭皆投竿泣悔因散遣之事稍定創修嶽麓書院置田以廩諸生俾肄業其中親爲策勵嘗行部至衡州府父老聞之舉手加額曰三十年慈母至矣皆羅拜車下廷標奉帷慰勞有若家人遷布政司參政督陝西糧儲道時已抱疾士民相率請留會武昌兵變羽書至湘潭猶強起視事月餘疾益篤乞養歸抵家卒

張裕釗濂亭文集福
建通志廣東通志

柴望字秩于仁和人順治四年進士累官廣東布政使嘗知山東萊州府遇水潦捐俸賑粥鄰郡百姓襁負就食全活甚衆膠州知

州與總鎮不協鎮兵譁然望親往安撫始定創築城東濠隄士民

德之名其隄爲柴公隄

萊州府志

駱鍾麟字挺生臨安人順治三年舉人明年會試副榜知陝西盩厔縣李顒講學里中鍾麟尊以師禮邑城北去渭不十里循行河畔知水勢將南侵議自覽家寨迤東開復故道衆難之不果康熙元年夏大雨渭水南溢將及城率僚屬跣雨中爲民請命久之雨止水徙北流者數里人以爲精誠所感八年遷江南常州知府爲政簡易民有訟者輒懇惻誨諭九年大水遍歷四鄉勸賑十年大旱葛衣草屨步禱躬詣郡獄日食糲飯一盂菜一匕引咎自責言與淚俱聞者感動建延陵書院率士大夫會講其中尋以艱去郡

人思之祀名宦祠

陝西通志
常州府志

施景麟字二麟郡人順治四年知東莞縣土賊蜂起外寇內訌近

郊多被蹂躪景麟編查排甲所部丁口以萬計一見卽識其人有

妄冒者立斥逐之聞警息率紳士登陴晝夜不懈會援勦兵至邑

始解嚴戎馬倥偬中輒集人士講藝明敏整暇人多誦之

廣州府志

許遴字聿求海甯人順治五年舉人知均州甫下車訪官民積弊

五六事陳督撫多所釐革武當山爲羽士窟穴鉤結繫援守土者

莫敢摘其奸遴急繩以法爲所譖遂罷歸

德星堂集

祝翼亮字匡廬海甯人順治五年舉人司李雷州鋤奸詰暴豪右

氣懾有鐵面之稱年三十五卒

海甯州志

查蜚英海甯人順治五年舉人知新興縣崇文講學獎勵後進改
建五賢祠置筠城書院集多士誦讀其中以憂去民爲立碑附祀

五賢祠

新興縣志

王潞字又韓餘杭人順治五年拔貢知湖廣麻城縣修舉廢墜禽
勦賊寇有封疆功舊例南糧皆收貯岐亭水次後移城內東南達
宋埠時或淺涸運送艱難潞率里長至宋埠水次收納費省十之

二終甘肅鞏昌府同知有政績

湖廣通志
餘杭縣志

馮紱來字子量新城人順治五年拔貢知江甯縣會海寇圍城六
十五日紱來堅守城賴以全士民爲立生祠行取不赴致仕歸

新城

縣志

王鉞字德衡仁和人少孤貧讀書見孫子十三篇又得陳皋梅聖俞之注而悅之遂精其學中順治五年武舉授江南大河衛千戶時漕政行月糧改折運官抵通通糧一石責償倍之公私交蠹督漕條奏格於部議鉞以領運入都乃具本折均平一疏得

俞旨運困以蘇擢直隸定州衛守備修城濬濠百廢具舉日與衛人士講學改江南上元後衛爲前明孝陵龍江英武三衛故地荒廢既久積逋五十金有奇鉞申請蠲除焉

田雯撰
墓誌

胡應澹臨安人順治中由貢生知江南豐縣有清勤敏之稱巨憝司桓犯大辟賂千金應澹不受力治其罪捐資創書院置田供廩餼士風丕振擢知直隸冀州值歲旱步禱傷暑卒於官弟應潘順

治六年進士累遷廣西桂林兵備道時大飢自楚載鹽二艇糴米三千斛以賑治兵撫民恩威並用稱粵西福曜以勞瘁卒

臨安縣志廣西

通志

朱家徵字止谿海甯人其先新安籍朱子裔也明崇禎十五年舉人十六年會試副榜順治間學使者檄署會稽學教諭盡心課士除敘州府推官蜀中兵火後城隍半毀官廨俱淪瓦礫家徵至令家僮伐木轉石編茅爲屋與居民雜處治以安靜禽草寇吳天民平白應龍之亂先是一城居民不過十數戶又贖難民一十六戶方初到官僚友燕集家徵卽問杜工部草堂安在明日往游中有故人正告曰足下書生夫吏有吏之事何及此爲少頃言及風土

家徵不禁憮然曰僕從川北來川西經塗千里青燐白骨纍纍出
草間非復人世所聞見我輩蒞茲土者作何生聚及是一意招徠
川中稍稍有足音在官六年自免歸歸則以著書爲事取漢魏六
朝三唐樂府詩集審聲辨體仿詩序例爲廣序復選兩漢至明二
十二代詔令奏疏爲經世書修海甯縣志合室能文子爾邁子婦
某氏孫三女孫芬皆能和家徵詩花晨月夕吟詠間作藝苑以爲
美談爾邁字人遠能舉所讀書悉發之於詩奇偉不名一格澤州
陳廷敬新城王士禎合肥李天馥先後招入都以疾南還卒

黃宗羲撰

墓誌銘海

甯州志

戴京曾字型遠錢塘人順治六年進士歷官大理寺丞慮囚多所

平反有囚見其叔捶其母而因以所荷鉏擊殺叔法司擬以故殺
京曾曰囚急母難母重傷仆地而叔尙奮擊止知救母耳且母與
叔孰親叔擊母而子不救非人情救母而至殺叔是爲親受過也

擬以誤傷非枉奏上是其議晉順天府丞以疾告歸

錢塘縣志

吳道煌字瑤如錢塘人順天籍順治六年進士知武康縣邑無城
郭溪嶺峻邃夙爲盜賊窟穴道煌治期年無一賊敢犯境者擢江
南蘇州知府新立駐防兵旋奉部撤觀望不去道煌恐民受其禍
具屏屢餼糧萬艘一夕齊發里巷歡呼慶更生吳郡財賦甲天下
故事分解諸部寺內外吏因緣爲奸長吏多得罪去道煌建議當
歸戶部法始畫一有巨家以他事牽連慮不測以家釀進發之皆

珠也力卻之且為雪其罪有妄男子指怨家通洋盜株連數百人
道煌驗其海舶叱曰誣也凡海舶必用巨木長數尋貫首尾曰龍
骨非此不行無此則民間江湖細舟耳竟從末減在任五年郡人

德之祠於虎邱

錢塘縣志參
丁澎撰傳

汪繼昌字徵五錢塘人順治六年進士累官廣東瓊州知府擢廣
西左參議撫卹反側招徠調贍軍民大悅李定國全軍壓境倉猝
無船繼昌自沈其裝招輕舟共濟旋乞假歸補湖廣按察司副使
備兵下江駐蘄州簡練防禦察奸固圉時征滇兵過蘄黃以徵夫

不足解官郡老幼奔號持筐酒送二百里外

顧景星
撰傳

方躍龍字去霓於潛人順治六年進士知湖廣華容縣土瘠而衝

賦重役繁竭力撫綏治稱最遷甘肅臨洮府同知

於潛縣志

袁英字千一新城人順治六年進士知陝西保安縣當明李數被兵民戶星散英招復流亡使民皆有生業擢山東青州同知致仕

歸

新城縣志

伍九官字虞賓於潛人順治八年由貢官知陽武縣性勤敏凡所

興築悉協輿情邑瀕河素患圯決九官悉心濬塞尋以勞卒官

於潛

縣志

胡恩虞字汭子昌化人順治八年選貢知婁縣下車卽約束舞文諸胥役尤者置之法先是邑多逋欠前令坐是繫獄三四人思虞至悉民疾苦實非抗課急遣僕歸賣田宅不足復貸諸戚旋得萬